

Augsburg, 26. Januar 1558

An Johannes Oporinus

UB Basel, Fr. Gr. I 11, fol. 216r.

Steinmann Nr. 708.

Lit.: Husner S. 159f. (mit Auszug).

S.

1. Si annotationes hae Isocrati adiungi non poterunt, eas mihi remitti velim. exemplum enim earum nullum retinui.

2. Si quam mihi spem facis, Isocratis, Aeschinis et Demosthenis Latinè duntaxat, charta regia aut mediana (quam vocant) grandiusculo charactere coniungendi: non defugiam laborem corrigendi et annotandi quicquid potero. Nam commentarios polliceri non ausim. Ex Vlpiano tamen excerpam, quicquid vtile putaro. Reliqua vndeunque diligentissimè conqueriram, vt quam paucissima ad eos autores intelligendos desiderentur. O quam praeclarum opus edes? quantum Bibliothecarum ornamentum? quam egregium Wolfij epitaphium? quam illustre Oporini trophyum? μεῖζον ἔσται νῦν τοῦτο ἢ τὴν τροίαν ἐλεῖν. Sed tu nihil incommodo tuo facias velim, et quid facturus sis et quando, me certiorem facias. Quicquid mihi ocij reliquum et occupationes meae et valetudo concesserint, id tuae typographiae consecrabitur, et fortasse θεός τις ἀπὸ μηχανῆς conatus nostros adiuuabit.

3. Nactus sum per D. Antonium Fuggerum Georgij Cedreni historiam, quae multas exterarum gentium res gestas a Zonara praetermissas exequitur. Ea παραλειπόμενα excerpam κεφαλαιωδῶς, et vt Latinus tuus Zonaras et Choniates non tantum emendatores, sed auctiores etiam edantur vno volumine, si tibi videbitur, curabo. Vale, ac quam primum quid me facere velis, significa. Augustae Vindelicorum 7 Cal[endas] Febr[uarij] 1558.

Hiero[nymus] Wolfius  
Tuus.